

XI - PRELAZNE I ZAVRŠNE ODREDBE

Član 56.

Postojeća postrojenja i djelatnosti

Postojeći uređaji i postrojenja koji već imaju odobrenje ili su već u funkciji u trenutku stupanja na snagu ovog Zakona ne mogu nastaviti rad ukoliko u roku od tri godine nakon stupanja na snagu ovog Zakona ne ispune sljedeće zahtjeve:

- u roku od šest mjeseci od stupanja na snagu ovog Zakona, vlasnik lokacije ili postrojenja će pripremiti i podnijeti nadležnim organima, radi odobrenja Plan prilagođavanja koji se sastoji iz korekcijskih mjera za koje vlasnik postrojenja smatra da su potrebne;
- nakon podnošenja Plana prilagođavanja, nadležni organ će donijeti odluku mogu li se aktivnosti nastaviti,
- na osnovu odobrenog Plana prilagođavanja nadležni organ će dopustiti rad i odrediti prelazno razdoblje za završetak realizacije Plana koji neće biti duži od tri godine od dana odobrenja.

U slučaju odbijanja Plana prilagođavanja nadležni organ će donijeti odluku o zatvaranju i aktivnosti nakon zatvaranja postrojenja ili lokacije.

U slučaju iz stava 2. ovoga člana ako postrojenje nije odlagalište ili konačno odlagalište zatvaranje će se obaviti u roku od tri godine nakon stupanja na snagu ovog Zakona.

U slučaju iz stava 2. ovoga člana ako se radi o odlagalištu, zatvaranje će se obaviti u roku od četiri godine nakon stupanja na snagu ovog Zakona.

U odluci iz stava 2. ovoga člana nadležni će organ propisati uslove budućih aktivnosti ili mjere za saniranje štete nanosene okolini, nadgledanje i naknadne aktivnosti.

Provedbenim popisom uredit će se sadržaj Plana prilagođavanja i aktivnosti koje će poduzeti nadležni organ.

Član 57.

Sva pravna lica uskladit će svoje aktivnosti s odredbama ovog Zakona u roku od jedne godine od dana stupanja na snagu ovog Zakona

Odredbe ovog Zakona primjenjivat će se na sve započete postupke za odobravanje obavljanja aktivnosti upravljanja otpadom u slučajevima za koje još nije donesena prvostepena odluka.

Član 58.

Odredbe Zakona o zaštiti okoline, koje se tiču nadležnosti drugih organa, primjenjivat će se u mjeri u kojoj nisu u suprotnosti s odredbama ovog Zakona.

Član 59.

Propis iz člana 8. donijet će Skupština u roku od 12 mjeseci od stupanja na snagu ovoga Zakona.

Provedbeni propis federalnog ministarstva o utvrđivanju uzorka, sadržaju i postupku obavješćivanja primjenjivati će se kao provedbeni propis iz člana 23. ovog Zakona.

Član 60.

Odredbe posebnih zakona koji uređuju pitanja upravljanja otpadom prestaju važiti na teritoriju Kantona, stupanjem na snagu ovog Zakona.

Član 61.

Ovaj Zakon stupa na snagu osmoga dana od dana objave u "Službenim novinama Hercegovačko-neretvanskog kantona".

Bosna i Hercegovina
Federacija Bosne i Hercegovine
HERCEGOVAČKO-NERETVANSKI KANTON
SKUPŠTINA

Broj: 02-01-XX-062/06
Mostar, 19. juna 2006. godine

PREDSJEDAVAJUĆI
Omer Čevra, s.r.

192

Na osnovu člana 39. Ustava Hercegovačko-neretvanskog kantona ("Službene novine HNK", broj: 2/98, 4/00 i 7/04) Skupština Hercegovačko-neretvanskog kantona, na sjednici održanoj dana 19. juna 2006. godine, donijela je

ZAKON OSPORTU

I- OPĆE ODREDBE

Član 1.

Ovim Zakonom uređuje se obavljanje sportskih djelatnosti, donošenje programa u oblasti sporta, osnivanje i rad sportskih organizacija, formiranje Sportskog saveza Kantona, općinskih sportskih saveza i strukovnih saveza, Savjet za sport, sistem sportske kulture, rad sportskih objekata, profesionalni, stručni i privatni rad u sportu, prava i obaveze sportista, zdravstveno osiguranje sportista, registri i inspekciju u sportu, finansiranje sporta i druga pitanja u vezi sa obavljanjem sportskih djelatnosti na području Hercegovačko-neretvanskog kantona (u daljem tekstu: Kanton).

Član 2.

Sistem sportske kulture, u smislu ovog Zakona, obuhvata sportski odgoj i obrazovanje, sport i sport-sku rekreaciju.

Član 3.

Sportski odgoj i obrazovanje obuhvata tjelesne i sportske aktivnosti djece, omladine i odraslih građana.

Sportski odgoj i obrazovanje ostvaruju se u okviru nastavnih planova i programa predškolskih ustanova, osnovnih i srednjih škola i univerziteta, kao i u okviru sporta i rekreacije.

Član 4.

Sport, u smislu ovog Zakona, obuhvata:

- a) organizovanje tjelesne aktivnosti djece, omladine i odraslih građana, koje se ostvaruju u okviru stručno usmjerenog tjelesnog vježbanja i sportskih treninga;
- b) posebno organizovanje tjelesne aktivnosti radi postizanja sportskih dostignuća, koja se ostvaruju utvrđenim takmičarskim pravilima, u oblasti sporta za lica sa invaliditetom, kvalitetnog sporta i vrhunskog sporta;
- c) sportska takmičenja i priredbe.

Član 5.

Sportska rekreacija obuhvata organizovane sportske aktivnosti djece, omladine i odraslih građana, koje se ostvaruju u okviru različitih oblika tjelesnog vježbanja.

Član 6.

Kvalitetan sport je priprema i takmičenje pojedina, koji nemaju objektivne stručne, organizacijske i materijalne mogućnosti za uključivanje u vrhunski sport, a program sportske rekreacije ih ne zadovoljava.

Član 7.

Vrhunski sport je priprema i takmičenje sportista koji imaju status međunarodne, svjetske i perspektivne klase.

Član 8.

Sport za lica sa invaliditetom je sportska aktivnost lica sa invaliditetom svih uzrasta, koji se bave dobrovoljnom sportom.

Član 9.

Kanton i jedinica lokalne samouprave se brinu za ostvarivanje javnog interesa u oblasti sporta.

Član 10.

Javni interes u sportu obuhvata potrebe Kantona, jedinice lokalne samouprave, sadržane u programima u oblasti sporta, naročito na području:

- a) sportskog odgoja i obrazovanja;
- b) sporta za lica sa invaliditetom;
- c) kvalitetnog sporta;
- d) vrhunskog sporta i
- e) sportske rekreacije.

Član 11.

Kanton ostvaruje javni interes u sportu tako što:

- a) obezbjeđuje sredstva za ostvarivanje programa u oblasti sporta Kantona;
- b) podstiče i obezbjeđuje uslove za obavljanje i razvoj sportskih djelatnosti Kantona;
- c) planira, izgrađuje i održava javne sportske objekte od kantonalnog značaja;
- d) provodi stimulativnu poresku politiku u oblasti sporta.

Član 12.

Jedinice lokalne samouprave i Hercegovačko-neretvanski kanton ostvaruju javni interes u sportu tako što:

- a) obezbjeđuju sredstva za ostvarivanje Programa u oblasti sporta Kantona, koja se odnose na jedinice lokalne samouprave;
- b) obezbjeđuju sredstva za ostvarivanje sportskih programa jedinica lokalne samouprave;
- c) podstiču i obezbjeđuju uslove za odvijanje i razvoj na području jedinica lokalne samouprave;
- d) planiraju, izgrađuju i održavaju javne sportske objekte jedinica lokalne samouprave.

Član 13.

Sredstva za ostvarivanje javnog interesa u sportu obezbjeđuju se iz Budžeta Kantona, Budžeta jedinica lokalne samouprave (u daljem tekstu: javna sredstva).

Član 14.

Sportska djelatnost može se obavljati kao profitabilna ili neprofitabilna djelatnost, u skladu sa zakonom.

II - PROGRAMI U OBLASTI SPORTA

Član 15.

Programima u oblasti sporta utvrđuju se osnovi politike i ostvarivanje javnog interesa u oblasti sporta.

Član 16.

Za ostvarivanje javnog interesa u oblasti sporta, u skladu sa programima u oblasti sporta, iz javnih sredstava se sufinansiraju sljedeći ciljevi:

- a) javni interes sportskog odgoja i obrazovanja djece i omladine;
- b) sportsko obrazovanje djece, omladine i odraslih građana usmjerenih ka kvalitetnom i vrhunskom sportu;
- c) sport za lica sa invaliditetom;
- d) sportski odgoj i obrazovanje djece, omladine i odraslih građana sa smetnjama u tjelesnom i psihičkom razvoju;
- e) sportsko obrazovanje studenata;
- f) kvalitetni sport;

- g) vrhunski sport;
- h) sportska rekreacija;
- i) obrazovanje i specijalna obuka stručnjaka za sport;
- j) izgradnja i održavanje javnih sportskih objekata;
- k) aktivnosti sportskih saveza i udruženja građana u oblasti sporta;
- l) informisanje u sportu;
- m) razvojno i naučno istraživanje u sportu;
- n) javno informisanje o sportu;
- o) izdavačka djelatnost;
- p) promotivne aktivnosti i savjetovanje u sportu;
- q) eksperimentalni programi u sportu;
- r) obavljanje stručnog nadzora u sportu;
- s) nagrađivanje u sportu i
- t) međunarodne aktivnosti u sportu.

Član 17.

Program u oblasti sporta Kantona (u daljnjem tekstu: Kantonalni sportski program) donosi Skupština Kantona, na prijedlog Vlade Kantona.

Kantonalni sportski program donosi se za period od najmanje pet godina.

Član 18.

Kantonalnim sportskim programom utvrđuju se naročito:

- a) vrhunski sport;
- b) načela i ciljevi politike u oblasti sporta na području Kantona;
- c) sadržaj i obim posebnih oblika sportskih aktivnosti koje se finansiraju ili sufinansiraju iz javnih sredstava kao što su sportski odgoj i obrazovanje, sportska rekreacija, vrhunski sport, kvalitetni sport, sportske aktivnosti učenika i studenata i sport za invalidna lica;
- d) kriteriji za finansiranje kantonalnog sportskog programa;
- e) razvojni i stručni poslovi u sportu;
- f) organizovanje sporta i kantonalnih sportskih takmičenja;
- g) upravljanje u sportu;
- h) subjekti, način i rokovi za realizaciju kantonalnog sportskog programa;

Član 19.

Program u oblasti sporta jedinica lokalne samouprave, u skladu sa Kantonalnim sportskim programom, donose u gradu gradsko vijeće, a u općini općinsko vijeće.

Sportski program jedinica lokalne samouprave donosi se za period od najmanje pet godina.

Član 20.

Sportskim programom jedinica lokalne samouprave utvrđuju se naročito:

- a) osnovna pitanja i usmjerenja u oblasti sporta na području jedinica lokalne samouprave;
- b) sadržaj i obim posebnih područja sportskih aktivnosti koje se finansiraju iz javnih sredstava jedinica lokalne samouprave;
- c) kriterije za finansiranje sportskog programa jedinica lokalne samouprave;
- d) organizovanje sporta kao i sportskih takmičenja jedinica lokalne samouprave;
- e) subjekti, način i rokovi za realizaciju sportskog programa jedinica lokalne samouprave.

Član 21.

Za sprovođenje Kantonalnog sportskog programa, sportskih programa jedinica lokalne samouprave, donose se godišnji programi u oblasti sporta (u daljnjem tekstu: godišnji sportski program).

Kantonalni godišnji sportski program donosi Vlada Kantona.

Godišnji sportski program jedinica lokalne samouprave, u gradu predlaže gradonačelnik, u općinama općinski načelnici, a usvaja u gradu gradsko vijeće, u općinama općinska vijeća.

Godišnji sportski programi za tekuću godinu donose se najkasnije do 31. januara tekuće godine.

Član 22.

Godišnjim sportskim programima utvrđuju se sportski programi za tekuću godinu, kriteriji za finansiranje, način njihovog finansiranja, subjekti, rokovi, obim i područje aktivnosti neophodnih za njihovu realizaciju.

Član 23.

Javna sredstva za finansiranje kantonalnih sportskih programa i projekata, na osnovu provedenog javnog konkursa, odobrava Vlada Kantona.

Javna sredstva za finansiranje sportskih programa i projekata jedinica lokalne samouprave, na osnovu provedenog javnog konkursa, predlaže u gradu gradonačelnik, u općinama općinski načelnici, a usvajaju u gradu gradsko vijeće, u općinama općinska vijeća.

Član 24.

Javna sredstva, iz člana 23. ovog Zakona, odobravaju se u skladu sa kriterijima utvrđenim sportskim programima Kantona, odnosno jedinica lokalne samouprave.

Član 25.

S odabranim izvršiocem sportskog programa, odnosno projekta, zaključuje se ugovor u pisanoj formi, kojim se između ostalog utvrđuje:

- a) sadržaj i obim programa, odnosno projekta;
- b) vrijeme realizacije;
- c) očekivana dostignuća;

- d) obim i način realizacije javnih sredstava;
- e) podnošenje izvještaja o izvršenju programa, odnosno projekta;
- f) druga međusobna prava i obaveze.

III - SAVJET ZA SPORT KANTONA

Član 26.

Za odlučivanje o stručnim pitanjima i za pružanje stručne pomoći za izradu sportskih programa i rješavanju drugih najvažnijih pitanja iz oblasti sporta Vlada Kantona osniva Savjet za sport Kantona, kao i stručno savjetodavno tijelo.

Predsjednik i članovi Savjeta za sport imenuju se na vrijeme od četiri godine i po isteku ovog vremena mogu biti ponovno imenovani.

Član 27.

Savjet za sport ima predsjednika i 8 članova.

Predsjednik i članovi Savjeta za sport imenuju se iz reda dokazanih stručnjaka s područja sportskog odgoja i obrazovanja, sportske rekreacije, kvalitetnog sporta, vrhunskog sporta.

Predsjednika Savjeta za sport imenuje Savjet za sport iz reda svojih članova.

Član 28.

Način rada Savjeta za sport utvrđuje se Poslovnikom o radu, koji usvaja Savjet za sport većinom glasova.

Sredstva za rad Savjeta za sport obezbjeđuju se iz Budžeta Kantona.

Član 29.

Savjet za sport:

- a) utvrđuje kriterije za kategorizaciju vrhunskih sportskih dostignuća i sticanje i trajanje zvanja vrhunskog sporta;
- b) daje mišljenje o prijedlozima zakona i drugih propisa iz oblasti sporta, kao i prijedlozima drugih zakona i drugih propisa, koji zadiru u oblast sporta;
- c) utvrđuje sadržaje i smjernice za donošenje kantonalnih sportskih programa;
- d) učestvuje u pripremi prijedloga Kantonalnog sportskog programa;
- e) prati i daje mišljenje o izvršenju kantonalnih sportskih programa;
- f) ocjenjuje stanje i razvoj sporta na području Kantona;
- g) daje inicijative i prijedloge za rješavanje i drugih najvažnijih pitanja iz oblasti sporta.

Član 30.

Vlada Kantona ulogu Savjeta za sport može prenijeti na Ministarstvo obrazovanja, nauke, kulture i sporta (u daljnjem tekstu: Ministarstvo), odnosno sektor sporta i informisanja.

IV - NOSIOCI DJELATNOSTI U OBLASTI SPORTA

Osnivanje i početak rada pravnih lica koja obavljaju djelatnosti u oblasti sporta

Član 31.

Sportski klubovi, udruženja i društva, sportske ustanove i druga pravna lica (u daljem tekstu: sportsko pravno lice) mogu obavljati sportske djelatnosti nakon sticanja statusa pravnog lica upisom u sudski ili drugi odgovarajući registar i nakon dobivanja odobrenja o ispunjavanju uslova za nosioce djelatnosti u oblasti sporta koje izdaje Ministarstvo.

Pored upisa u sudski ili drugi odgovarajući registar sportsko pravno lice koje je dobilo odobrenje Ministarstva o ispunjavanju uslova za nosioca djelatnosti iz oblasti sporta se upisuje i u registar sportskih pravnih lica (u daljem tekstu: Registar) koji vodi Ministarstvo.

Bliži propis o sadržaju, obliku i načinu vođenja, te postupku upisa i brisanja iz Registra donosi ministar.

Član 32.

Standardima i normativima utvrđuju se jedinstveni kriteriji za rad sportskog pravnog lica, nosioca djelatnosti u oblasti sporta, kao i kriteriji i način dobivanja saglasnosti za izgradnju sportskih objekata.

Član 33.

Sportska pravna lica mogu početi obavljati registrovane djelatnosti iz oblasti sporta nakon što Ministarstvo utvrdi da ispunjava jedinstvene kriterije za rad sportskog pravnog lica (standarde i normative) i posebne uslove za obavljanje sportske djelatnosti.

Član 34.

Pod posebnim uslovima za obavljanje sportske djelatnosti u smislu ovog Zakona podrazumijeva se ispunjavanje sljedećih minimalnih uslova za sportsko pravno lice:

- a) da ima najmanje jednog stručnog sportskog radnika koji ima licencu za obavljanje stručnog sportskog posla,
- b) da ima prostor i potrebnu infrastrukturu, koja omogućava nesmetano obavljanje djelatnosti u oblasti sporta,
- c) da ima program kojim su definisani ciljevi, zadaci i način finansiranja.

Propise iz stava (1) ovog člana donosi ministar, a propise iz člana 32. ovog Zakona ministar uz saglasnost Vlade HNK.

Član 35.

Sportski klubovi, udruženja i društva (u daljem tekstu: sportska udruženja građana) osnivaju se na način predviđen Zakonom o udruženjima i fondacijama u Federaciji Bosne i Hercegovine.

Član 36.

Sportsko udruženje građana koje želi biti nosilac djelatnosti u oblasti sporta (sportsko pravno lice), podnosi zahtjev Ministarstvu za sticanje statusa udruženja od posebnog javnog interesa.

Član 37.

Sportsko udruženje građana koje stekne status pravnog lica od posebnog javnog interesa će uživati poreske, carinske i druge olakšice u skladu sa posebnim zakonima, te steći uslove za konkurisanje u djelimičnom budžetskom finansiranju.

Na drugoj strani sportsko udruženje građana od posebnog interesa imat će pojačanu kontrolu organizacije rada uključujući i obavezno podnošenje godišnjeg izvještaja Ministarstvu koje mora sadržavati opis aktivnosti i bilansu stanja koja pokazuje prihode i rashode.

Član 38.

Rješenje o upisu u Registar sportskog udruženja građana sa statusom udruženja od posebnog javnog interesa donosi ministar.

Član 39.

Upisom u Registar sportskih pravnih lica udruženje od posebnog javnog interesa stiče pravo obavljati djelatnosti u oblasti sporta u skladu sa Zakonom i drugim propisima.

Član 40.

Ministarstvo je dužno najmanje jedanput u dvije godine utvrditi da li sportsko pravno lice ispunjava uslove, iz člana 34. ovog Zakona.

Ako sportsko pravno lice ne ispunjava uslove, iz člana 34. Zakona, Ministarstvo će donijeti rješenje kojim će se odrediti rok za otklanjanje nedostataka.

Ako u roku, ostavljenom rješenjem iz stava 2. ovog člana, nedostaci ne budu otklonjeni, Ministarstvo će rješenjem zabraniti rad sportskog pravnog lica, odnosno donijeti rješenje o prestanku rada sportskog pravnog lica i o tome obavijestiti osnivača.

Na osnovu rješenja o prestanku rada bit će brisano sportsko pravno lice iz registra i sudskog i drugog registra.

*Sportista i vrhunski sportista***Član 41.**

Sportista, shodno odredbama ovog Zakona, je fizičko lice koje je registrovano u odgovarajućem sportskom savezu, odnosno strukovnom savezu i učestvuje u treninzima, sportskim takmičenjima i sportskim priredbama.

Član 42.

Status vrhunskog sportiste stiče građanin Bosne i Hercegovine koji postigne vrhunske sportske rezultate na međunarodnom nivou.

Kriterije za vrhunska sportska dostignuća, iz stava 1. ovog člana i trajanje statusa vrhunskog sportiste utvrđuje Savjet za sport.

Zvanje vrhunskog sportiste dodjeljuje Sportski savez Kantona, na osnovu Kriterija, iz stava 2. ovog člana.

Član 43.

Vrhunski sportista može ostvariti pravo na:

- a) zdravstveno osiguranje;
- b) osiguranje od nesretnog slučaja (sportskih povreda, odnosno smrti);
- c) porodijsko odsustvo;
- d) penzijsko i invalidsko osiguranje;
- e) pogodnosti za izvršavanje obaveza školovanja;
- f) stipendiju.

Bliži propis o ostvarivanju prava, iz stava 1. ovog člana, donosi ministar.

Član 44.

Vrhunski sportista je obavezan da:

- a) učestvuje na takmičenjima u sastavu reprezentacije Bosne i Hercegovine, kada je pozvan;
- b) ponaša se u skladu sa međunarodnim propisima i propisima sportskih saveza, kao i normama sportske etike i morala.

Član 45.

O zahtjevu za ostvarivanje prava vrhunskog sportiste odlučuje ministar.

Vrhunskom sportisti, koji neopravdano ne ispunjava svoje dužnosti može ministar, po pribavljenom mišljenju nadležnog Sportskog saveza, ograničiti ili oduzeti prava koja mu pripadaju po osnovu statusa vrhunskog sportiste.

Član 46.

Sportsko pravno lice mora osigurati da sportske aktivnosti ne utiču negativno na zdravlje sportista članova sportskog pravnog lica.

Član 47.

Periodični i parcijalni zdravstveni pregledi obavezni su za sportiste koji nastupaju na redovnim takmičenjima.

Bliži propis o uslovima i načinu obavljanja preventivnih zdravstvenih pregleda donosi ministar, uz prethodnu saglasnost ministra zdravstva, rada i socijalne zaštite Kantona.

Član 48.

Niko ne može od sportiste zahtijevati da trenira ili da se takmiči za vrijeme dok je bolestan ili povrijeđen.

Član 49.

U oblasti sporta obavezna je primjena odredaba Evropske konvencije protiv dopinga i propisa Međunarodnog olimpijskog komiteta.

Sportski profesionalci i stručnjaci
Član 50.

Stručni radnik u sportu je lice koje obavlja odgojno-obrazovne ili stručno-organizacijske poslove u sportu (u daljem tekstu: stručni sportski radnik).

Sportski radnik u sportu mora imati odgovarajuće stručno obrazovanje, iz oblasti sporta u skladu sa propisima iz oblasti obrazovanja odnosno odgovarajuću kvalifikaciju i osposobljenost.

Bliži propis o stručnoj spremi i načinu odgovarajuće kvalifikacije ili osposobljenosti donosi ministar.

Član 51.

Odgojno-obrazovne poslove u oblasti sporta može obavljati lice koje ima više, odnosno visoko obrazovanje iz oblasti sporta.

Član 52.

Stručni sportski radnik, koji ima odgovarajuće stručno obrazovanje iz oblasti sporta, odnosno odgovarajuću kvalifikaciju i osposobljenost i neposredno obavlja odgojno-obrazovne ili stručno organizacijske poslove u sportu, po završenom pripravnničkom stažu, polaže stručni ispit.

Član 53.

Uvjerjenje o kvalifikaciji, odnosno osposobljenosti izdaje nadležna obrazovna ustanova, odnosno odgovarajući stručni organ Sportskog saveza, u skladu sa propisima iz člana 50. stav 2.

Član 54.

Na osnovu uvjerenja o kvalifikaciji, odnosno osposobljenosti (iz člana 50. ovog Zakona), Licencu za obavljanje stručnog posla izdaje strukovni sportski savez Kantona.

Kriterije za izdavanje licence, iz stava 1. ovog člana, utvrđuje Sportski savez Kantona.

Član 55.

Svako fizičko lice može obavljati poslove u sportu kao privatni sportski radnik, ako pored općih uslova ispunjava i posebne:

- ima odgovarajuće obrazovanje ili odgovarajuću kvalifikaciju da se bavi ovim aktivnostima, u skladu s ovim Zakonom;
- posjeduje licencu za obavljanje sportskih aktivnosti;
- ako mu nije pravosnažnom odlukom zabranjeno obavljanje te djelatnosti.

Član 56.

Privatni sportski radnici se upisuju u registar privatnih sportskih radnika.

Registar privatnih sportskih radnika vodi Ministarstvo.

Bliži propis o sadržaju i načinu vođenja Registra privatnih sportskih radnika donosi ministar.

Član 57.

Svako fizičko lice može se baviti sportom kao profesionalni sportista ako:

- ima 15 ili više godina;
- ako je aktivni sportista;
- ako je član Kantonalnog sportskog saveza, odnosno granskog sportskog saveza;
- ako ima stalno ili privremeno boravište u Bosni i Hercegovini;
- ako ima ugovor o profesionalnom angažmanu.

Profesionalni sportisti se upisuju u registar profesionalnih sportista.

Registar profesionalnih sportskih radnika vodi Ministarstvo.

Bliži propis o sadržaju i načinu vođenja Registra profesionalnih sportista donosi ministar.

Član 58.

Privatni sportski radnik i profesionalni sportista može biti brisan iz Registra na vlastiti zahtjev ili po odluci Ministarstva. Ministarstvo donosi rješenje o brisanju iz Registra ako utvrdi da:

- više ne ispunjava propisane uslove;
- mu je izrečena pravosnažna presuda kojom mu se zabranjuje djelatnost u sportu;
- se ne ponaša u skladu s međunarodnim pravilima i pravilima nacionalnih sportskih saveza, kao i u skladu s normama sportske etike.

V - SPORTSKI OBJEKTI
Član 59.

Sportski objekti jedinica lokalne samouprave su: plivališta, klizališta, trim staze, skijaški tereni i drugi zatvoreni i otvoreni objekti i površine namijenjeni ostvarivanju u sportu.

Član 60.

Saglasno ovom Zakonu javni sportski objekti su objekti u vlasništvu Kantona, ili jedinica lokalne samouprave

Član 61.

Javni sportski objekat mora se upotrebljavati za potrebe sporta i u svrhe za koje je izgrađen i uređen.

Ako se javnom sportskom objektu promjeni namjena, mora se obezbijediti zamjena sportskog objekta nekim drugim sportskim objektom.

Član 62.

Izvršioци sportskog programa koji sprovode godišnji sportski program iz kantonalnog programa imaju prednost za upotrebu sportskih objekata u odnosu na druge sportske izvršioce.

Oblici održavanja, upotrebe, upravljanja i korištenja javnih sportskih objekata regulišu se posebnim ugovorima sa korisnicima usluga.

Član 63.

Sportski objekti upisuju se u Evidenciju sportskih objekata (u daljnjem tekstu: Evidencija).

Evidenciju vodi Ministarstvo.

Bliži propis o sadržaju i načinu vođenja Evidencije donosi ministar.

VI - FINANSIRANJE SPORTA

Član 64.

Osnovu finansiranja u sportu čine prihodi koje ostvare sportska pravna lica, koja obavljaju sportsku djelatnost, članarine i dobiti od priređivanja igara na sreću i drugih izvora finansiranja, u skladu sa zakonom.

Sufinansiranje sporta vrši se iz sredstava Budžeta Kantona, budžeta jedinica lokalne samouprave, a sportska pravna lica od javnog interesa i na način kako je to predviđeno ovim Zakonom.

VII - SPORTKE PRIREDBE

Član 65.

Sportske priredbe su organizovana sportska okupljanja i sportska takmičenja.

Član 66.

Međunarodne sportske priredbe su:

- a) olimpijske igre i paraolimpijske igre;
- b) mediteranske igre i paramediteranske igre;
- c) univerzijade;
- d) svjetska i evropska prvenstva (također i omladinske);
- e) svjetski kupovi i evropski kupovi;
- f) gran pri mitinzi i turniri na kojem učestvuju takmičari najmanje 10 nacija;
- g) regionalna prvenstva (Balkanske igre i Srednjeevropske igre).

Članak 67.

Na sportskim priredbama zabranjeno je obavljanje, prikazivanje i bilo kakvo reklamiranje proizvoda štetnih po zdravlje.

Član 68.

Sigurnost održavanja sportskih priredaba na području Hercegovačko-neretvanskog kantona, sigurnost gledatelja, takmičara i drugih učesnika sportskog takmičenja ili sportske priredbe regulisani su odredbama Zakona o sprečavanju nereda na sportskim takmičenjima u Hercegovačko-neretvanskom kantonu ("Službene novine HNK", broj: 3/2005.).

VIII - NADZOR

Član 69.

Nadzor nad provođenjem ovog Zakona vrši Ministarstvo.

Član 70.

Inspeksijski nadzor u oblasti sporta obavlja inspekcija Ministarstva.

IX - KAZNE NE ODREDBE

Član 71.

Novčanom kaznom od 50 do 5.000 KM kaznit će se za prekršaj pravno lice ili imatelj radnje.

- a) Sportsko pravno lice, odnosno poslodavac, koje nema najmanje jednog radnika koji ima obaveznu stručnu spremu ili stručnu kvalifikaciju za obavljanje stručnih poslova u sportu (član 34. stav 1. tačka a. ovog Zakona);
- b) Otpočne sa radom prije upisa u Registar (član 31. ovog Zakona);
- c) Sportsko pravno lice, koje se ne pobrine za izvršenje aktivnog zdravstvenog osiguranja sportista, članova sportskog pravnog lica (član 47. ovog Zakona);
- d) Sportsko pravno lice ili odgovorno lice koje zahtjeva od sportiste da trenira ili se takmiči za vrijeme bolesti ili povrede (člana 48. ovog Zakona);
- e) Sportista, organizator sportske priredbe, izvršilac godišnjeg sportskog programa ili odgovorni zdravstveni radnik ako ne postupaju u skladu s propisima iz Anti-doping konvencije Savjeta Evrope i odlukama Međunarodnog olimpijskog komiteta (član 49. ovog Zakona);
- f) Sportska pravna lica za:
 - 1) dopuštanje objavljivanja oglasa i reklama po zdravlje štetnih proizvoda suprotno članu 67. ovog Zakona,
 - 2) odnosno lice za nepoštivanje odredbi Zakona o sprječavanju nereda na sportskim takmičenjima u Hercegovačko-neretvanskom kantonu («Službene novine HNK», broj 3/05).

X - PRELAZNE I ZAVRŠNE ODREDBE

Član 72.

Na sportska pravna lica primjenjuju se propisi o ustanovama, udruženju građana i drugi propisi, ako ovim Zakonom nije drugačije određeno.

Član 73.

Postojeća pravna lica, koja obavljaju djelatnost iz oblasti sporta, dužna su u roku od godinu dana od dana stupanja na snagu ovog Zakona, uskladiti svoju organizaciju, djelatnost i opća akta sa odredbama ovog Zakona.

Član 74.

Fizička lica, koja obavljaju djelatnost u oblasti sporta kao privatni sportski radnici ili kao profesionalni sportisti dužni su upisati se u Registar privatnih sportskih radnika, odnosno Registar profesionalnih sportista, u roku od godinu dana od dana donošenja

podzakonskih akata o sadržaju, obliku i načinu vođenja postupka upisa i brisanja iz ovih registara, iz člana 55. i člana 56. ovog Zakona.

Član 75.

Radnici u oblasti sporta, koji u vrijeme stupanja na snagu ovog Zakona ne ispunjavaju uslove obrazovanja propisane ovim Zakonom, mogu nastaviti obavljanje odgojno-obrazovnog rada u sportu sa postojećom stručnom spremom.

Radnici, iz stava 1. ovog člana, dužni su, u roku 4 godine od stupanja na snagu ovog Zakona, ispuniti propisane uslove.

Ukoliko ne ispune propisane uslove, radnicima iz stava 2. ovog člana, prestaje radni odnos.

Član 76.

Sportski radnici, koji nemaju položen stručni ispit iz oblasti sporta do stupanja na snagu ovog Zakona, mogu nastaviti da obavljaju svoj posao, pod uslovom da polože stručni ispit u roku od dvije godine od dana stupanja na snagu ovog Zakona.

Član 77.

Vlada Kantona će imenovati Savjet za sport u roku od tri mjeseca od dana stupanja na snagu ovog Zakona.

Član 78.

Ministarstvo će donijeti podzakonske akte za izvršenje ovog Zakona u roku od godinu dana od dana stupanja na snagu ovog Zakona.

Član 79.

Ovaj Zakon stupa na snagu osmog dana od dana objavljivanja u "Službenim novinama Hercegovačko-neretvanskog kantona".

Bosna i Hercegovina
 Federacija Bosne i Hercegovine
HERCEGOVAČKO-NERETVANSKI KANTON
SKUPŠTINA

Broj: 02-01-XX-080/06
 Mostar, 19. juna 2006. godine

PREDSJEDAVAJUĆI
 Omer Čevra, s.r.

VLADA HERCEGOVAČKO-NERETVANSKOG KANTONA

193

Na osnovu člana 17. stav 1. i člana 18. stav 2. Zakona o Vladi Hercegovačko-neretvanskog kantona ("Sl. novine HNK", broj 2/98 i 3/01) i člana 27. Zakona o izvršenju Budžeta HNK za 2006. godinu ("Sl. novine HNK", broj 2/06), Vlada Hercegovačko-neretvanskog kantona je na 59. sjednici održanoj 10.07.2006. godine, d o n i j e l a:

ODLUKU

**O ODOBRAVANJU NOVČANIH
 SREDSTAVA IZ BUDŽETA HNK
 ZA 2006. GODINU MINISTARSTVU
 OBRAZOVANJA, NAUKE, KULTURE I
 SPORTA SA POZICIJE "SPORT"**

I

Plivačkom klubu VELEŽ Mostar odobravaju se novčana sredstva u iznosu od 3.000,00 KM (slovima: trihiljade KM) za održavanje Ljetnog apsolutnog prvenstva Bosne i Hercegovine u plivanju.

II

Sredstva iz tačke I Odluke osigurat će se u Budžetu HNK za 2006. godinu sa pozicije Ministarstva obrazovanja, nauke, kulture i sporta, organizaciona jedinica 17080003, ekonomski kod 614100 - "Sport".

III

Za realizaciju Odluke zadužuje se Ministarstvo obrazovanja, nauke, kulture i sporta i Ministarstvo finansija.

IV

Odluka stupa na snagu danom donošenja, a objavit će se u "Službenim novinama Hercegovačko-neretvanskog kantona".

Bosna i Hercegovina
 Federacija Bosne i Hercegovine
HERCEGOVAČKO-NERETVANSKI KANTON
V L A D A

Broj: 01-1-02-1162/06
 Mostar, 10.07.2006.

PREDSJEDNIK
 mr. sc. Miroslav Ćorić, s.r.